



鮑氏集卷第一

舞鶴賦

散幽經以驗物偉胎化之仙禽鍾浮曠之藻質
抱清迥之明心指蓬壺而翻翰望崑閬而揚音
匝日域以迴驚窮天步而高尋踐神區其既遠
積靈祀而方多精含丹而星耀頂凝紫而烟華
引圓吭之纖婉頓脩趾之鴻嬌疊霜毛而弄影
振玉羽而臨霞朝戲於芝田夕飲乎瑤池厭江
海而游澤掩雲羅而見羈去帝鄉之岑寂歸人
寰之喧卑歲崢嶸而催暝心惆悵而哀離於是

窮陰殺節急景凋年涼沙振野箕風動天嚴嚴
苦霧皎皎悲泉水塞長河雪滿群山既而霧昏
夜歇景物澄廓星翻漢回曉月將落感寒鷄之
早晨憐霜鴈之遠漠臨驚風之蕭條對流光之
昭灼唳清響於丹墀舞容飛於金閣始連軒以
鳳蹯終宛轉而龍躍躑躅徘徊振迅騰摧驚身
蓬集矯翅雪飛離網別赴合渚相依將與中止
若往而歸颺沓矜顧遷延遲暮逸翮後塵翔翥
先路指會規翔臨歧矩步態有遺奸貌無停趣
奔機逗節角睐分形長揚一作揚翹緩驚並翼連聲

輕迹凌亂浮影交橫衆變繁姿參差洊密烟交
霧疑若無毛質風去雨還不可談悉旣散魂而
盪目迷不知其所之忽星離而雲羅整神容而
自持仰天居之崇絕更惆悵而驚思當是時也
燕姬色沮巴僮心恥巾拂兩停九劔雙止雖邯
鄲其敢倫豈陽阿之能擬入衛國而乘軒出吳
都而傾市守馴養於千齡結長悲於萬里

蕪城賦

登廣陵城作

灞池平原南馳蒼梧漲海北走紫塞鴈門拖以
漕渠軸以崑岡重關復江之奧四會五達之莊

當昔全盛之時車挂轉人駕肩屢閉撲地歌吹
沸天孽貨鹽田鏹利銅山才力雄富士馬精研
故能侈秦法佚周令劃崇墉剗濬洫圖脩世以
休命是以板築雉堞之殷井幹烽櫓之勤格高
五嶽袤廣三墳崒若斷岸矗似長雲製磁石以
禦衝糊頰壤以飛文觀基扃之固護將萬祀而
一君出入三代五百餘載竟瓜割而豆分澤葵
依井荒葛冒途壇羅虺蜮階闔麇鼯木魅山鬼
野鼠城狐嗥雨嘯風昏見晨趨饑鷹礪吻寒鴟
嚇雛伏暴藏虎乳血餐膚崩榛塞路崢嶸古堧

白楊早落塞草前衰稜稜霜氣刺刺風威孤蓬
自振驚沙坐飛灌莽杳而無際叢薄紛其相依
通池旣已夷峻隅又已頽直視千里外唯見起
黃埃凝思寂聽心場已摧若夫藻扃黼帳歌堂
舞閣之基璇淵碧樹弋林釣渚之館吳蔡齊秦
之聲魚龍爵馬之玩皆薰歇燼滅光沉響絕東
都妙姬南國佳人蕙心紈質玉貌絳脣莫不埋
菟幽石委骨窮鹿豈憶同輦之愉樂離宮之苦
辛哉天道如何吞恨者多抽琴命操為燕城之
歌謠曰邊風起兮城上寒井徑滅兮丘壟殘千

齡兮萬代共盡兮何言

芙蓉賦

感衣裳於楚賦詠憂思於陳詩訪群英之艷絕
標高名於澤芝會春陂乎夕張舉芙蓉而水嬉
抽我衿之桂蘭點子吻之瑜辭選群芳之徽號
抱茲性之清芬稟若華之驚絕單蒞陽之妙手
測澆池之光潔爍彤輝之明媚粲雕霞之繁悅
顧椒丘而非偶豈園桃而能埒彪炳以蒨藻粹
京而紅波青房兮規接紫的兮圓羅樹妖遙之
弱幹散菡萏之輕荷上星光而倒景下龍鱗而

隱波戲錦鱗而夕映曜繡羽以晨過結游童之
湘吹起榜妾之江歌備日月之溫麗非盛明而
謂何若乃當融風之暄盪承暑雨之平渥被瑤
塘之周流繞金渠之屈曲排積霧而揚芬鏡洞
泉而含綠葉折水以爲珠條集露而成玉潤蓬
山之璫膏輝葱河之銀燭冠五華於仙草超四
照於靈本雜衆姿於開卷閱羣貌於昏明無長
袖之容止信不笑之空城森紫葉以上擢紛湘
蕊而不傾根雖割而瑄徹柯旣解而絲縈感盛
衰之可懷質始終而常清故其爲芳也綢繆其

爲媚也奔發對粧則色姝比蘭則香越泛明彩
於宵波飛澄華於曉月陋荆姬之朱顏咲夏女
之光髮恨狎世而貽賤徒愛存而賞沒雖凌群
以擅竒終從歲而零歇

遊思賦

雲徑兮海衝上潮兮送風秋水兮駕浦涼煙兮
冒江暮氣起兮遠岸黑陽精滅兮天際紅波汙
汙兮無底山森森兮萬重平隰兮巨岸通川兮
瀉壑仰盡兮天經俯窮兮地絡望波際兮曇曇
眺雲間兮灼灼乃江南之斷山信海上之飛鶴

指烟霞而問鄉窺林嶼而訪泊撫身事而識苦
念親愛而知樂苦與樂其何言悼人生之長役
捨堂宇之密親坐江潭而爲客對蕪葭之遂黃
視零露之方白鴻晨驚以響湍泉夜下而鳴石
結中洲之雲蘿託綿思於遙夕瞻荆吳之遠山
望邯鄲之長陌塞風馳兮邊草飛胡沙起兮鴈
揚翻雖燕越之異心在禽鳥而同戚悵收情而
技淚遣繁悲而自抑此日中其幾時彼月滿而
將蝕生無患於不老奚引憂以自逼物因節以
卷舒道與運而升息賤賣卜以當壚隱我耕而

子織誠愛秦王之奇勇不願絕筋而稱力已矣
哉使豫章生而可知夫何異乎叢棘

飛蛾賦

仙鼠伺闇飛螿候明均靈舛化詭欲齊生觀齊
生而欲詭各會住以憑方凌焦煙之浮景赴熙
燄之明光拔身幽草下畢命在此堂木輕死以
邀得雖糜爛其何傷豈學山南之文豹避雲霧
而巖藏

鮑氏集卷第一

鮑氏集卷第二

尺蠖賦

智哉尺蠖觀機而作伸非向厚屈非向薄當靜
泉渟遇躁風驚起軒軀以曠跨伏累氣而併形
冰炭弗觸鋒刃歷迂逢嶮感躋值夷舒步忌好
退之見猜哀必進而爲蠹每驤首以瞰途常佇
景而翻露故身不豫託地無前期動靜必觀於
物消息各隨乎時從方而應何慮何思是以軍
算慕其權國容擬其變高賢圖之以隱淪智士
以之而藏見笑靈蛇之夕蟄羞龍德之方戰理

害道而爲尤事傷生而感賤苟見義而守勇豈
專取於弦箭

觀漏賦 升丙

客有觀於漏者退而嘆曰夫及遠者箭也而定
遠非箭之功爲生者我也而制生非我之情故
自箭而爲心不可憑者弦因生以觀我不可恃
者馬憑其不可恃故以悲哉况乎沉華密遠輕
波潛耗而感神嬰慮者又自外而傷壽以是思
生生亦勤矣乃爲賦云

珮流歎於馳年纓華思於奔月結蘭茗以望楚
弄參差以歌越撫凝肌於遷滯鑑雕容於彷彿
景有墜而易昏憂無方而難歇歷玫瑰階而升隩
訪金壺之盈缺觀騰波之吞瀉視驚箭之登沒
箭旣沒而復登波長瀉而弗歸注沉穴而海漏
射懸塗而電飛墮戶牖而知天掩雲霧而測暉
創百齡於纖隱積千里於空微彼崢嶸而行溢
此冉冉而逾衰撫寸心而未改指分光而未遠
昔傷矢之奔禽聞虛弦之顛仆徒嬰刃而知懼
豈潛機之能覺惟生經之霍靡亦悲長而懼促
橫證古而秉心抱空意其如玉波沉沉而東注

日滔滔而西屬落繁馨於纖草殞豐華於喬木
對昊離而後歌據窮蹊而方哭雖接薪之更傳
寔絕明之還續貫古今而并念信寡易而多難
時不留乎激矢生乃急於走丸既河源之莫壅
又吹波而助瀾神怵迫而多慮心轉轉而尠歡
望天涯而佇念擢雄劔而長歎嗟生民之永迷
躬與後而皆恤死零落而無二生差池之非一
理幽分於化前筭冥定於天秩與艾骨而招病
猶剗腸而興疾情殊用而俱盡事離方而同失
聊弭志以高歌順烟雨而沉逸於是隨秋鴻而

汎渚逐春燕而登梁進賦詩而展念退陳酒以
排傷物不可以兩大得無得而雙昌薰晚花而
後落槿早秀而前亡姑屏憂以愉思樂茲情於
寸光從江河之紆直委天地之回方漏盈兮漏
虛長無絕兮芬芳

鵝賦 并序

有獻野鷺於臨川王世子愍其樊繫命為之賦
辭

陳之集以自遠而稱神栖漢之雀乃出幽而
此珍此瓌禽其何取亦廁景而承仁捨水澤之

歡逸對鐘鼓之悲辛豈徇利而輕命將感愛而
投身入長羅之逼脅恨高繳之樊縈邈辭朋而
別偶超烟鷺而風行跨日月而遙逝忽瞻國而
望城踐菲迹於瑤塗昇弱羽於丹庭震東西之
繡戶眺左右之金扃貌纖殺而含悴心翻越而
慙驚若墜而墮谷况不知其所寧惟君囿之珍
麗實妙物之所殷翔海澤之輕鷗巢天宿之鳴
鶉鶡程材於臬猛翬薦體之雕文既敷容以照
景亦選翮以排雲雖居物以成偶終在我以非
群望征虜一作雲而延悼顧委翼而自傷無青雀

之嘶命乏赤鴈之嘉祥空穢君之園池徒慚君
之稻梁願引身而剪迹抱末志而幽藏於是流
歲遂遠慘節方崇雲纏海岱風拂嶠潼飛雲馳
霰飄沙舞蓬視清池之初涸望綠林之始空立
菰蒲之寒渚託隻影而為雙宛拔啄而掩貲悲
結悵而滿胸處朝晝而雖念假外見而遷排涉
脩夜之長寂信專思而知哀風稍稍而過樹月
蒼蒼而照臺冰依岸而早結霜託草而先摧斂
雙翻於水裔翹孤趾於林隈情無方而雨集事
有限而星垂在俄頃而猶悼矧窮生之所懷聞

宿世之高賢澤無微而不均育草木而明義愛禽鳥而昭仁全殞卵而來鳳放乳麋而感麟雖陋生於萬物若沙漠之一塵苟全軀而畢命庶竟報以自申

傷逝賦

晨登南山望美中阿露溥秋槿風捲寒蘿恹愴傷心悲如之何盡若窮烟離若剪弦如影滅地猶星殞天棄華宇於明世閉金扃於下泉永山河以自畢眇千齡而弗旋思一言於向時邈衆代於古年逝稍遠而變體浸幽明而改時覽篇

迹之如旦婉遺意而在茲忽若謂其不然自惆悵而驚疑循堂廡而下降歷闔戶而升基服委襟而褫帶器蒙管而韜絲志存業而遺績身先物而長辭豈重歡而可覲追前感之無期寒往暑來而不窮哀極樂反而有終燧已遷而禮革月既逾而慶通心微微而就遠跡離離而絕容白日藹而回陰閨館寂而深重冀憑靈於前物佇美目乎房櫳徒望思以永久邈歸來其何從結單心於暮條掩行淚於晨風念沉悼而誰劇獨嬰哀於逝躬草忌霜而逼秋人惡老而逼衰

誠衰耄之可忌或甘願而志違彼一息之短景
乃累恨之長暉尋平生之好醜成黃塵之是非
將滅耶而尚在何有去而無歸惟桃李之零落
生有促而非夭觀龜鵠之千祀年能富而情少
反靈質於二塗亂感悅於雙抱日月飄而不留
命倏忽而誰保譬明隙之在梁如風露之停草
髮迎憂而送華貌光悴而收藻共甘苦其幾人
曾無得而偕老拂埃琴而抽思啓陳書而邀討
自古來而有之夫何怨乎天道

園葵賦

風暖凌開土冒泉動游塵曝日鳴雉依隴主人
拂黃冠拭藜杖布蔬種平圻壤通畔修直膏畝
夷敞白莖紫蒂豚耳鴨掌溝東陌西行三畦兩
既區既鉏乃露乃映勾萌欲伸藂牙將散爾乃
晨露夕陰霏雲四委沉雷遠震飛雨輕灑徐未
及晞疾而不靡柔莖爰秀剛甲以解稚葉平布
弱陰競抽萋萋翼翼沃沃油油下歲蕤而被徑
上參差而覆疇承朝陽之麗景得傾柯之所投
仕非魯相有不拔之利賓惟二仲無逸馬之憂
顧董茶而莫偶豈蘋藻之薦羞若乃鄰老談稼

鮑氏集卷第二
女嫗歸桑拂此葦席炊彼稌梁甃壺援醢曲瓢
卷漿乃羹乃淪堆鼎盈筐甘旨蒨脆柔滑芬芳
消淋逐水潤胃調腸於是既飫徹盤投筭回小
人之腹爲君子之慮近觀物運遠訪師聖聲數
後彰律理前定烏非黔黑鶴豈浴淨彼圓行而
方止固行之於天性伊冬箠而夏裘無雙功而
並盛盪然任心樂道安命春風夕來秋日晨映
獨酌南軒擁琴孤聽篇章間作以歌以詠魚深
沉而鳥高飛孰知美色之爲正

鮑氏集卷第二

鮑氏集卷第三

代東武吟

主人且勿誼賤子歌一言僕本寒鄉士出身蒙
漢恩始隨張校尉召募到河源後逐李輕車追
虜出塞垣密途亘萬里寧歲猶七奔肌力盡鞍
甲心思歷涼溫將軍旣下世部曲亦罕存時事
一朝異孤績誰復論少壯辭家去窮老還人門
腰鎌刈葵藿倚杖牧鷄豚昔如鞞上鷹今似檻
中猿徒結千載恨空負百年怨弃席思君幄疲
馬戀君軒願垂晉主惠不愧田子寬

代出自薊北門行

羽檄起邊亭烽火入咸陽徵師屯廣武分兵救朔方嚴秋筋竿勁虜陣精且彊天子按劍怒使者遙相望鴈行綠石徑魚貫渡飛梁蕭鼓流漢思旌甲被胡霜疾風衝塞起沙礫自飄揚馬毛縮如蝟角弓不可張時危見臣節世亂識忠良投軀報明主身死爲國殤

代結客少年場行

驄馬金絡頭錦帶佩吳鉤失意杯酒間白刃起相讐追兵一旦至負劍遠行游去鄉三十載復

得還舊丘升高臨四關表裡望皇州九塗平若水雙闕似雲浮扶宮羅將相夾道列王侯日中市朝滿車馬若川流擊鐘陳鼎食方駕自相求今我獨何爲埽壤懷百憂

代東門行

傷禽惡弦驚倦客惡離聲離轂斷客情賓御皆涕零涕零心斷絕將去復還訣一息不相知何況異鄉別遙遙征駕遠杳杳白日晚居人拵閨卧行子夜中飯野風吹秋木行子心腸斷食梅常苦酸衣葛常苦寒絲竹徒滿坐憂人不解顏

長歌欲自慰彌起長恨端

代苦熱行

赤坂橫西阻火山赫南威身熱頭且痛鳥墜魂
來歸湯泉發雲潭焦烟起石圻日月有恒昏雨
露未嘗晞丹蛇踰百尺玄蜂盈十圍含沙射流
影吹蠱病行暉瘴氣晝薰體茵露夜沾衣饑餒
莫下食晨禽不敢飛毒涇尚多死渡瀘寧具腓
生軀蹈死地昌志登禍機戈船榮既薄伏波賞
亦微爵輕君尚惜士重安可希

代白頭吟

直如朱絲繩清如玉壺冰何慙宿昔意猜恨坐
相仍人情賤恩舊世議逐衰興毫髮一爲瑕丘
山不可勝食苗實碩鼠黠白信蒼蠅鳧遠成
美薪芻前見陵申黜褒女進班去趙姬昇周王
日淪惑漢帝益嗟稱心賞猶難恃貌恭豈易憑
古來共如此非君獨撫膺

代蒿里行

同盡無貴賤殊願有窮申馳波催永夜零露逼
詰晨驅我幽山駕去此滿堂親虛容遺劍珮實
貌戢衣巾斗酒安可酌尺書誰復陳年代稍推

遠懷抱日幽淪人生良自劇天道與何人齎我
長恨意歸為狐兔塵

代放歌行

蓼蟲避葵董習苦不言非小人自齷齪安知曠
士懷雞鳴洛城裏禁門平旦開冠蓋縱橫至車
騎四方來素帶曳長飈華纓結遠埃日中安能
止鐘鳴猶未歸夷世不可逢賢君信愛才明慮
自天斷不受外嫌猜一言分珪爵片善辭草萊
豈伊白璧賜將起黃金臺今君有何疾臨路獨
遲迴

代升天行

家世宅關輔勝帶官王城備聞十帝事委曲兩
都情倦見物興衰驟覩俗屯平翩翩若回掌恍
惚似朝榮窮途悔短計晚志重長生從師入遠
嶽結友事仙靈五圖發金記九籥隱丹經風餐
委松宿雲卧恣天行冠霞登綵閣解玉飲椒庭
躡遊越萬里少別數千齡鳳臺無還駕簫管有
遺聲何時與汝曹啄腐共吞腥

代別鶴操

雙鶴俱起時徘徊滄海間長弄若天漢輕軀似

雲懸幽客時結侶提携遊三山青繳凌瑤臺丹
羅籠紫烟海上悲風急三山多雲霧散亂一相
失驚孤不得住緬然日月馳遠矣絕音儀有願
而不遂無怨以生離鹿鳴隱深草蟬鳴隱高枝
心自有所存傍人那得知

代雉朝飛

雉朝飛振羽翼專場挾兩恃強力媒已驚翳又
逼黃間潛殼盧矢直勿繡頸碎錦臆絕命君前
無怨色握君手執杯酒意氣相傾死何有

代淮南王

淮南王好長生服食練氣讀仙經琉璃作盃牙
作盤金鼎玉七合神丹合神丹戲紫房紫房綵
女弄明璫鸞歌鳳舞斷君腸朱城九門門九閨
願逐明月入君懷入君懷結君珮怨君恨君恃
君愛築城思堅劔思利同盛同衰莫相棄

代空城雀

雀乳四轂空城之阿朝食野粟夕飲冰河高飛
畏鴟鳶下飛畏網羅辛傷伊何言怵迫良已多
誠不及青鳥遠食玉山禾猶勝吳宮燕無罪得
焚窠賦命有厚薄長嘆欲如何

代夜坐吟

冬夜沉沉夜坐吟
含聲未發已知心
霜入幕風度林
朱燈滅朱顏尋體
君歌逐君音不貴
聲貴意深

代鳴鴈行

嗷嗷鳴鴈鳴始旦
齊行命侶入雲漢
中夜相失群離亂
留連徘徊不忍散
憔悴容儀君不知
辛苦風霜亦何爲

代北風涼行

北風涼雨雪雱京
洛女兒多嚴粧
遙豔帷中自

悲傷沉吟不語
若有忘問君得行
何當歸苦使妾坐
自傷悲慮年至慮
顏衰情易遠恨難
迫

代春日行

獻歲發吾將行
春山茂春日明
園中鳥多嘉聲
梅始發
莢始青
汎舟艦齊
擢鷲奏採菱
歌鹿鳴風微起
波微生
絃亦發
酒亦傾
入蓮池
折桂枝
芳神動
芬葉披
兩相思
兩不知

代少年時至衰老行

憶昔少年時
馳逐好名晨
結友多貴門
出入富兒隣
綺羅艷華風
車馬自揚塵
歌唱青琴女
彈

魚集三
七
箏燕趙人好酒多芳氣
餽味厭時新
今日每相念
此事邈無因
寄語後生子
作樂當及春

代陽春登荆山行

旦登荆山頭
崎嶇道難遊
早行犯霜露
苔滑不可留
極眺入雲表
窮目盡帝州
方都列萬室
層城帶高樓
奕奕朱軒馳
紛紛縞衣流
日氛映山浦
暄霧逐風收
花木亂平原
桑柘盈平疇
攀條弄紫莖
藉露折芳柔
遇物雖成趣
念者不解憂
且共傾春酒
長歌登山丘

代明月行

朗月出東山
照我綺窓前
窓中多佳人
被服妖且妍
靚粧坐帳裏
當戶弄清絃
髮奪衛女迅
躰絕飛燕先
為君歌一曲
當作朗月篇
酒至顏自解
聲和心亦宣
千金何足重
所存意氣間

代堂上歌行

四坐且莫諠
聽我堂上歌
昔仕京洛時
高門臨長河
出入重宮裡
結友曹與何
車馬相馳逐
賓朋好容華
陽春孟春月
朝光散流霞
輕步逐芳風
言笑弄丹葩
暉暉朱顏酡
紛紛織女梭
滿堂皆美人
自我對湘娥
雖謝侍君閒
明粧帶綺羅

魚集三
七
箏笛更彈吹高唱好相和萬曲不關心一曲動
情多欲知情厚薄更聽此轂過

代貧賤愁苦行

湮沒雖死悲貧苦即生劇長嘆至天曉愁苦窮
日夕盛顏當少歇鬢髮先老白親友四面絕朋
知斷三益空庭慙樹萱藥餌媿過客貧年忘日
時黯顏就人惜俄頃不相覓恹恹面已赤或以
一金恨便成百年隙心爲千條計事未見一獲
運圯津途塞遂轉死溝洫以此窮百年不如還
窀穸

代邊居行

少年遠京陽遙遙萬里方陋巷絕人徑茅屋摧
山岡不覩車馬迹但見麋鹿場長松何落落丘
壟無復行邊地無高木蕭蕭多白楊盛年日月
盡一去萬恨長悠悠世中人爭此錐刀忙不憶
貧賤時富貴輒相忘紛紛徒滿目何關慨予傷
不如一畝中高會挹清漿遇樂便作樂莫使候
朝光

代門有車馬客行

門有車馬客問客何鄉士捷步往相訊果得舊

鄰里悽悽聲中情慙慙增下理語昔有故悲論
今無新喜清晨相訪慰日暮不能已歡戚競尋
緒談調何終止辭端竟未究忽唱分途始前悲
尚未弭後感方復起嘶聲盈我口談言在君耳
手迹可傳心願爾篤行李

代悲哉行

羈人感淑景緣感欲回轍我行詎幾時華實驟
舒結覩實情有悲瞻華意無悅覽物懷同志如
何復乖別翩翩翔禽羅關關鳴鳥川翔鳴尚疇
偶所嘆獨乖絕

代權歌行

羈客離嬰時飄颻無定所昔秋寓江介茲春客
河許徃戢于役身願言永懷楚泠泠篠䟽潭噓
噓鴈循渚颺戾長風振搖曳高帆舉驚波無留
連舟人不躊竚

代邽街行

竚立出門衢遙望轉蓬飛蓬去舊根在連翩逝
不歸念我捨鄉俗親好久乖違慷慨懷長想惆
悵戀音微人生隨時變遷化焉可祈百年難必
果千慮易盈虧

代陳思王白馬篇

白馬駢角弓鳴鞭乘北風要途問邊急雜虜入
 雲中閉壁自徃夏清野徑還冬僞裝多闕絕旅
 服少裁縫埋身守漢節沉命對胡封薄暮塞雲
 起飛沙披遠松含悲望兩都楚歌登四墉丈夫
 設計誤懷恨逐邊戎罷別中國愛邀冀胡馬功
 去來今河道卑賤生所鍾但令塞上兒知我獨
 為雄

代陳思王京洛篇

鳳樓十二重四戶八綺窗綉楠金蓮花桂柱玉

盤龍珠簾無隔露羅幌不勝風寶帳三千所為
 爾一朝容揚芬紫煙上垂綵綵雲中春吹回白
 日霜歌落塞鴻但懼秋塵越盛愛逐衰蓬坐視
 青苔滿臥對錦筵空琴瑟縱橫散舞衣不復縫
 古來共歇薄君意豈獨濃惟見雙黃鵠千里一
 相從

代陸平原君子有所思行

西出登雀臺東下望雲闕層閣肅天居馳道直
 如髮繡薨結飛霞璇題納行月築山擬蓬壺穿
 池類溟渤選色遍齊岱徵聲匝邛越陳鍾陪夕

宴笙歌待明發年貌不可還身意會盈歇蟻壤
漏山阿絲淚毀金骨器惡含滿歌物忌厚生沒
智哉衆多士服理辨昭昧

代白紵曲二首

朱脣動素袖舉洛陽小童邯鄲女古稱綠水今
白紵催絃急管為君舞窮秋九月荷葉黃北風
驅鴈天雨霜夜長酒多樂未央
春風澹蕩俠思多天色淨綠氣妍和含桃紅萼
蘭紫牙朝日灼爍發園華卷幌結帷羅玉筵齊
謳秦吹盧女絃千金顧咲買芳年

代白紵舞歌詞四首

侍郎臣鮑照啓被教作白紵舞歌詞謹竭庸陋
裁為四曲附啓上呈識方泐悴思塗猥局言既
無雅聲未能文不足以宣贊 聖旨抽拔妙實
謹遣簡餘慙隨悚盈謹啓 詞曰

吳刀楚製為佩褱織羅霧縠垂羽衣含商咀徵
歌露晞珠履颯沓紈袖飛淒風夏起素雲回車
怠馬煩客忘歸蘭膏明燭承夜輝

桂宮栢寢擬天居朱雀文窓韜碧疏象床瑤席
鎮犀渠雕屏合匝組帷舒秦箏趙瑟挾笙竽玎

璫散珮盈玉除停觴不御欲誰須
三星差池露霑濕絃悲管清月將入寒光蕭條
候蟲急荆王流嘆楚妃泣紅顏難長時易戢凝
華結綵久延立非君之故豈妄集
池中赤鯉庖所捐琴高乘去飛上天命逢福世
丁溢恩簪金藉綺昇曲筵恩厚德深委如山潔
誠洗志期暮年烏白馬角寧足言

鮑氏集卷第三

鮑氏集卷第四

擬古八首

魯客事楚王懷金襲丹素既荷主人恩又蒙令
尹顧日晏罷朝歸輿馬塞衢路宗黨生光輝賓
僕遠傾慕富貴人所欲道德亦何懼南國有儒
生迷方獨淪誤伐木清江湄設罝守兔兔

又

十五諷詩書篇翰靡不通弱冠參多士飛步游
秦宮側觀君子論預見古人風兩說窮舌端五
車摧筆鋒羞當白璧貶耻受聊城功晚節從世

務乘障遠和我解珮襲犀渠卷裘奉盧弓始願
力不及安知今所終

又

幽并重騎射少年好馳逐羶帶佩雙鞬象弧插
彫服獸肥春草短飛鞚趙平陸朝遊鴈門上暮
還樓煩宿石梁有餘勁驚雀無全目漢虜方木
和邊城屢翻覆留我一白羽將以分符竹

又

鑿井北陵隈百丈不及泉生事本瀾漫何用獨
精堅幼壯重寸陰衰暮及輕年放駕息朝歌提

爵止中仙日夕登城隅周迴視洛川街衢積凍
草城郭宿寒烟繁華悉何在宮闕久崩填充謗
齊景非徒稱夷叔賢

又

伊昔不治業倦遊觀五都海岱饒壯士蒙泗多
宿儒結髮起躍馬垂白對講書呼我升上席陳
觶發瓢壺管仲死已久墓在西北隅後面在鬼
者桓公舊塚盧君來誠既晚不覩崇明初玉琬
徒見傳交友義漸踈

又

東薪幽篁裡刈黍寒澗陰朔風傷我肌號鳥驚
思心歲暮并賦訖程課相追尋田租送函谷獸
藁輪上林河渭冰未開關隴雪正深苔擊官有
罰呵辱吏見侵不謂乘軒意伏櫪還至今

又

河畔草未黃胡鴈已矯翼秋螿扶戶吟寒婦成
夜織去歲征人還流傳舊相識聞君上壘時東
望久歎息宿昔改衣帶朝旦異容色念此憂如
何夜長愁更多明鏡塵匣中瑤琴生網羅

又

蜀漢多竒山仰望與雲平陰崖積夏雪陽谷散
秋榮朝朝見雲歸夜夜聞猿鳴憂人本自悲孤
客易傷情臨堂設樽酒留酌思平生石以堅爲
性君勿慙一作素誠

擬青青陵上栢二首

涓涓亂江泉綿綿橫海煙浮生旅昭世空事歎
華年書翰幸閒暇我酌子縈絃飛鑣出荆路驚
服秦川

渭濱富皇居鱗館匝河山輿童唱秉椒擢女歌
采蓮孚愉鸞閣上窈窕鳳楹前娛生信非謬安

用求多賢

學劉公幹體五首

欲宦乏王事結主遠恩私爲身不爲名散書徒
滿帷連冰上冬月披雪拾園葵聖靈燭區外小
臣良見遺

曠曠寒野霧蒼蒼陰山栢樹迥霧縈集山寒野
風急歲物盡淪傷孤貞爲誰立賴對自能貞不
計迹幽澁

胡風吹朔雪千里度龍山集君瑤臺上飛舞兩
楹前茲晨自爲美當避艷陽天艷陽桃李節皎

潔不成妍

荷生綠泉中碧葉齊如規迴風蕩流霧珠水逐
條垂彪炳此金塘藻耀君王池不愁世賞絕但
畏盛明移

白日正中時天下共明光北園有細草當晝正
含霜垂榮頰如此何用獨芬芳抽琴爲爾歌絃
斷不成章

擬阮公夜中不能寐

漏分不能卧酌酒亂繁憂惠氣憑清夜素景緣
隙流鳴鶴時一聞千里絕無儔佇立爲誰久寂

寔空自愁

學陶彭澤體

長憂非生意短願不須多但使鑄酒滿朋舊數
相過秋風七八月清露潤綺羅提琴當戶坐歎
息望天河保此無傾動寧復滯風波

紹古辭七首

橘生湘水側菲陋人莫傳逢君金華宴得在玉
几前三川窮名利京洛富妖妍恩榮難久恃隆
寵易衰偏觀席妾悽愴覩翰君泫然徒抱忠孝
志猶為葑菲遷

昔與君別時蠶妾初獻絲何言年月駛寒衣已
擣治縑繡多廢亂篇帛久塵縑離心壯為劇飛
念如懸旗石席我不爽德音君勿欺

瑟瑟涼海風竦竦寒山木紛紛羈思盈慙慙夜
絃促訪言山海路千里歌別鶴絃絕空咨嗟形
音誰賞錄辛苦異人狀美貌改如玉徒畜巧言
鳥不解心欵曲

孤鴻散江嶼連翩遵渚飛含嘶衝桂浦馳顧河
朔畿攢攢勁秋木昭昭淨冬暉窓前滌歡爵帳
裏縫舞衣芳歲猶自可日夜望君歸

憑楹翫夜月迥眺出谷雲還山路已遠往海不
及鄰一作羣徘徊清淮汭顧慕廣江濱物情垂喜
歇守操古難聞三越豐少姿容態傾動君
開黛覩容顏臨鏡訪遙塗君子事河源彌祀闕
還書春風掃地起飛塵生綺疏文桂爲誰設羅
帳空卷舒不怨身孤寂但念星隱隅
暖歲節物早萬萌迎春達春風夜嬈娟春霧朝
暝靄軟蘭葉可采柔桑條易捋怨咽對風景悶
瞀守閨闥天傳愁民命含生但契闊憂來無行
伍歷亂如覃葛

幽蘭五首

傾輝引暮色孤景留恩顏梅歇春欲罷期渡往
不還

簾委蘭蕙露帳合桃李風攬帶昔何道坐令芳
節終

結珮徒分明抱渠輒乖忤花落知不終空愁坐
相誤

眇眇蛸掛網漠漠蚕弄絲空慙不自信怯與君
劃期

陳國鄭東門古今共所知長袖暫徘徊駟馬停

路岐

學古

北風十二月雪下如亂巾實是愁苦節惆悵憶
情親會得兩少妾同是洛陽人嫖絲好眉目閒
麗美腰身凝膚皎若雪明淨色如神驕愛生盼
矚聲媚起朱唇衿服雜緹績首飾亂瓊珍調絃
俱起舞爲我唱梁塵人生貴得意懷願待君巾
幸慎嚴冬暮幽夜方未晨齊衾久兩說角枕已
雙陳願君早休息留歌待三春

鮑氏集卷第四

鮑氏集卷第五

潯陽還都道中

昨夜宿南陵今旦入蘆洲客行惜日月崩波不
可留侵星赴早路畢景逐前儔鱗鱗夕雲起獵
獵晚風道騰沙鬱黃霧翻浪揚白鷗登艫跳淮
甸掩泣望荆流絕目盡平原時見遠煙浮倏忽
坐還合俄思甚兼秋未嘗遠戶庭安能千里遊
誰令乏古節貽此越鄉憂

還都道中三首

悅懌遂還心踊躍貪至勤鳴雞戒征路暮息落

日分急流騰飛沫回風起江濱孤獸啼夜侶離
鴻噪霜群物衰心交橫聲切思紛紜歎慨訴同
旅美人無相聞

風急訊灣浦裝高偃檣舳夕聽江上波遠極千
里日寒律驚窮蹊爽氣起喬木隱隱日沒岫瑟
瑟風發谷鳥還暮林誼潮上冰結泮夜分霜下
淒悲端出遙陸愁來攢人懷羈心苦獨宿

久宦迷遠川川廣每多思薄止閭邊亭關歷險
程路霍霽冥寓岫濛昧江上霧時涼籟爭吹流
洊浪奔趣測焉增愁起搔首東南顧茫然荒野

中舉皆凜素回風揚江泌寒棲動樹太息終
晨漏企我歸颺遇

還都口號

分壤蕃帝華列正藹皇宮禮讌及年暇朝奏因
歲繼丹歌金景結棹俟昌風狂歌首寒物歸吹
踐開冬陰沉煙塞合蕭瑟涼海空馳霜急歸節
幽雲慘天容旌鼓貫玄塗羽鷁被長江君王遲
京國遊子思鄉邦恩世共渝洽身願兩扳逢勉
哉河濟客勤爾尺波功

還都至三山望石頭城

泉源安首流川末澄遠波晨光被水族曉氣歇
林阿兩江皎平迥三山鬱駢羅南帆望越嶠北
榜指齊河關扁繞天邑襟帶袍尊華長城非壑
嶮峻咀似荆茅攢樓貫白日檣堞隱丹霞征夫
喜觀國遊子遲見家流連入京引躑躅望鄉歌
彌前歎景促逾近勸路多偕萃猶如茲弘易將
謂何

遇銅山掘黃精

土昉閔中經水芝韜內策寶餌緩童年命藥駐
衰曆矧蓄終古情重拾烟霧迹羊角棲斷雲槥
口流隘石銅溪沉晝森乳竇夜涓滴旣類風門
磴復象天井壁蹠蹠寒葉離濃濃秋水積松色
隨野深月露依草白空守江海思豈愧梁鄭客
得仁古無怨順道今何惜

日落望江贈荀丞

旅人乏愉樂薄暝增思深日落崔雲歸延頸望
江陰亂流漾大壑長霧匝高林林際無窮極雲
邊不可尋惟見獨飛鳥千里一揚音推其感物
情則知遊子心君居帝京內高會日揮金豈念
慕群客咨嗟戀景沉

行樂至城東橋

鷄鳴關吏起伐鼓早通晨嚴車臨迥陌延瞰歷
城闈蔓草緣高隅脩楊夾廣津迅風首旦發平
路塞飛塵擾擾遊宦子營營市井人懷金近從
利撫劍遠辭親爭先萬里途各事百年身開芳
及稚節含綵吝驚春尊賢永照灼孤賤長隱淪
容華坐銷歇端爲誰苦辛

答客

幽居屬有念含意未連詞會客從外來問君何
所思澄神自惆悵嘿慮久迴疑謂賓少安席方
爲子陳之我以葦門士負學謝前基愛賞好偏
越放縱少矜持專求遂性樂不計緝名期歡至
獨斟酒憂來輒賦詩聲交稍希歇此意更堅滋
浮生急馳電物道險絃絲深憂寡情謬進伏兩
睽時願賜卜身要得免後賢嗤

白雲

探靈喜解骨測化善騰天情高不戀俗厭世樂
尋仙鍊金宿明館肩玉止瑤淵鳳歌出林闕龍
駕淚蓬山凌崖采三露攀鴻戲五煙昭昭景臨
霞湯湯風媚泉命娥雙月際要媛兩星間飛虹

眺卷河汎霧弄輕絃笛
轂謝廣賓神道不復傳
一逐白雲去千齡猶未旋

和王丞

限生歸有窮長憶無已年
秋心日迫絕春思坐
連綿街協曠古願斟酌
高代賢遯迹俱浮海採
藥共還山夜聽橫石波
朝望宿巖烟明澗子
泐越飛蘿子縈牽性好
必齊逐跡幽非妄傳滅
志身世表藏名琴酒間

秋夜二首

夜久膏旣竭啓明旦未央
環情倦始復空閣起

晨裝幸承天光轉曲景
入幽堂徘徊集通隙宛
轉燭迴梁帷風自卷舒
簾露視成行歲役急窮
晏生慮備温涼絲紈夙
染濯綿綿夜裁張冬雪
旦夕至公子乏衣裳華
心愛零落非直惜容光
願君翦眾念且共覆前觴

遁跡避紛喧賀農棲寂寞
荒徑馳野鼠空庭聚
山雀旣遠人世歡還賴
泉卉樂折柳樊塲圃負
綆汲潭壑霽旦見雲峰
風夜聞海鶴江介早寒
來白露先秋落麻壘方
結葉瓜田已掃籜傾暉
忽西下迴景思華幙攀
蘿席中軒臨觴不能酌

終古自多恨幽悲共淪鑠

觀圃人藝植

善賈笑蠶漁巧宦賤農牧遠養遍關市深利窮
海陸乘輶實金羈當鑪信珠服居無逸身伎安
得坐梁肉徒承屬生幸政緩吏平睦春畦及耘
藝秋場早芟築澤閱旣繁高山營又登熟抱鍤
壠上飡結茅野中宿空織已尚淳寧知俗翻覆

詠採桑

季春梅始落工女事蠶作採桑淇洧間還戲上
宮閣早蒲時結陰晚篁初解籜藹藹霧洒閨融

融景盈幕乳燕逐草蟲巢蜂拾花藥是節最暄
妍佳服又新爍綿歎對迥塗揚歌弄塲藿抽琴
試抒思薦珮果成託承君郢中美服義久心諾
衛風古愉艷鄭俗舊浮薄靈願悲渡湘宓笑
漣洛盛明難重来淵意為誰涸君其且調絃桂
酒妾行酌

詠雙燕二首

覆燕戲雲崖羽翰始差池出入南閨裡經過北
堂墮意欲巢君幕層楹不可窺沉吟芳歲晚徘徊
韶景移悲歌辭舊愛銜淚覓新知

可憐雲中燕旦去暮來歸自知羽翅弱不與鵠
爭飛寄聲謝飛鵠往事子毛衣瑣心誠貧薄巨
丟節榮衰陰山饒苦霧危節多勁威豈但避霜
雪當一作復做野人機

發後渚

江上氣早寒仲秋始霜雪從軍乏衣糧方冬與
家別蕭條背鄉心悽愴清渚發涼埃晦平臯飛
潮隱脩孤光獨徘徊空煙視昇滅途隨前峰
遠意逐後雲結華志公馳年韶顏慘驚節推琴
三起嘆轂爲君斷絕

數詩

一身仕關西家族滿山東二年從車駕齋祭甘
泉宮三朝國慶畢休沐還舊邦四牡輝長路輕
蓋若飛鴻五侯相餞送高會集新豐六樂陳廣
坐祖帳揚春風七盤起長袖庭下列歌鐘八珍
盈雕俎綺肴紛錯重九族共瞻遲賓友仰徽容
十載學無就善宦一朝通

建除

建旗出燉煌西討屬國羌除去徒與騎戰車羅
萬箱滿山又填谷投鞍合營墻平原亘千里旗

魚集五
鼓轉相望定含後未休後驛勅前裝執戟無暫
傾彎弧不解張破滅西零國生虜郅支王危亂
悉平蕩萬里置開梁成軍入玉門士女獻壺漿
收功在一時歷世荷餘光開壤襲朱紱左右佩
金章閉帷草太玄茲事殆愚狂

從過舊宮

肅裝屬雲旅奉勒承末塗嚴恭履桑梓加敬覽
枌榆靈命蘊川瀆帝珺伏篇圖虎變由石細龍
翔自鼎湖功冠生民始道妙神器初宮陞留前
制歌思溢今衢餘祥見雲物遺像存陶漁泉流

信清泌原野實甘荼豈伊愛鄴鄙天險兼上腴
東秦邦北門非親誰克居仁聲日月懋惠澤雲
雨敷廬令美何歇唐風久不渝微臣逢世慶征
賦備人徒空費行葦德採束謝生芻

從拜陵登京峴

孟冬十月交殺盛陰欲終風烈無勁草寒甚有
凋松軍井冰晝結士馬擅夜重晨登峴山首霜
雪凝未通息鞍循隴上支劍望雲峯表裡觀地
嶮升降究天容東岳覆如礪瀛海安足窮傷哉
良永矣馳光不再中衰賤謝遠願疲老還舊邦

深德竟何報徒令田陌空

臨川王服竟還田里

送佳禮有終事居慙懦薄稅駕罷朝衣歸志願
巢壑尋思邈無報退命愧天爵捨耨將十齡還
得守場藿道經盈竹筥農書滿塵閣愴愴秋風
生戚戚寒緯作豐霧粲草華高月麗雲岵屏跡
勤躬稼衰疾倚芝藥顧此謝人群豈直止商洛

鮑氏集卷第五

鮑氏集卷第六

行京口至竹里

高柯危且竦鋒石橫復仄復澗隱松聲重崖伏
雲色冰閉寒方壯風動鳥傾翼斯志逢凋嚴孤
遊值曠逼兼塗無憇鞍半菽不遑食君子樹令
名細人効命力不見長河水清濁俱不息

登翻車峴

高山絕雲霓深谷斷無光晝夜淪霧雨冬夏結
寒霜淖坂既馬嶺磧路又羊腸畏途疑旅 忌
轍覆行箱昇岑望原陸四眺極川梁遊子思故

居離客遲新鄉新知有客慰追故遊子傷

冬日

嚴雲亂山起白日欲還次曠霧蔽窮天夕陰晦
寒地煙霾有氛氲精光無明異風急野田空饑
禽稍相棄含生共通閉懷賢敦為利天規苟平
圓寧得已偏媚瀉海有歸潮衰容不還稚君今
且安歌無念老方至

詠忠 作史

五都矜財雄三川養敵利白金不市死明經有
高位京城十二衢飛薨各鱗次仕子影華纓游

客竦輕轡明星晨未稀軒蓋已雲至賓御紛颯
沓鞍馬光照地寒暑在一時繁華及春媚君平
獨寂寞身世兩相棄

從庾中郎遊園山石室

荒塗趣山楹雲崖隱靈一作虛室岡澗紛縈抱林

障沓重密昏昏磴路深活活梁水疾幽隅秉晝
燭地牖窺朝日怪石似龍章瑕壁麗錦質洞庭
安可窮漏井終不溢沉空絕景聲崩危坐驚慄
神化豈有方妙象竟無述至哉鍊玉人處此長
自畢

自礪山東望震澤

瀾漫潭洞波合沓崿嶂雲漲島遠不測岡澗近
難分幽篁愁暮見思鳥傷夕聞以此藉沉痾棲
迹別人羣結言非盡書有念豈敷文

登雲陽九里埭

一作塚

宿心不復歸流年抱哀疾既成雲雨人悲緒終
不一徒憶江南轂空錄齊后瑟方絕縈絃思豈
見繞梁日

吳興黃浦亭庾中郎別

風起洲渚寒雲上日無輝連山眇烟霧長波迥

難依旅鴈方南過浮客未西歸已經江海別復
與親春違奔景易有窮離袖安可揮懽觴爲悲
酌歌服成泣衣温念終不渝藻志遠存追役人
多牽滯顧路慚奮飛昧心附遠翰烟言藏珮常

與伍侍郎別

民生如野鹿知愛不知命飲齧具攢聚翹陸歛
驚迸傷我慕類心感爾食苹性漫漫鄢郢途渺
渺淮海逕子無金石質吾有犬馬病憂樂安可
言離會孰能定欽哉慎所宜砥德乃爲盛貧游
不可忘久交念敦敬

送別王宣城

發郢流楚思涉淇興衛情既逢青春獻復值白
蘋生廣望周千里江郊藹微明舉爵自惆悵歌
管為誰清潁陰騰前藻淮陽流昔聲樹道慕高
華屬路佇深馨

送從弟道秀別

參差生密念躑躅行思悲悲思戀光景密念盈
一作彌歲時歲時多阻折光景乏安怡以此苦風
情日夜驚懸旗登山臨朝日揚袂別所思浸淫
旦潮廣瀾漫宿雲滋天陰愍先發路遠常早辭

篇詩後相憶杯酒今無持游子苦行役冀會非
遠期

贈傅都曹別

輕鴻戲江潭孤鴈集洲汜邂逅兩相親綠念共
無已風雨好東西一隔頓萬里追憶栖宿時聲
客滿心耳日落川緒寒愁雲遶天起短翮不能
翔徘徊煙霧裏

和傅大農與僚故別

絕節無緩響傷鴈有哀音非同年歲意誰異別
離心伊昔謬通塗冠屣預人林浮江望南嶽登

潮窺海陰孰謂游居淺慕美久相深萋萋春草
秀嚶嚶喜候禽辰物盡明茂尊盛獨幽沉之子
安所適我方棲舊岑墜歡豈更接明愛邈難尋

送盛侍郎餞候亭

霑霜襲冠帶驅駕越城闈北臨出塞道南望入
鄉津高墉宿寒霧平野起秋塵君爲坐堂子我
乃負羈人欣悲豈等志甘苦誠異身結涕園中
草憔悴悲此春

與荀中書別

勞舟厭長浪疲旆倦行風連翩感孤志契闊傷

賤躬親交篤離愛眷戀置酒終敷文勉征念發
藻慰愁容思君吟涉洧撫已謠渡江慙無黃鶴
翅安得久相從願遂宿知意不使舊山空

喜雨奉勅作

營社達群陰屯雲滄積陽河井起龍蒸日魄斂
遊光族雲飛泉室震風沉羽鄉升霧浹地維傾
潤瀉天潢平灑周海嶽曲潦溢川莊驚雷鳴桂
渚迴消流玉堂珍木抽翠條炎卉濯朱芳關市
欣九賦京廩開萬箱無謝堯為君何用知栢皇

詠蕭史

蕭史愛少年羸女
去童顏火粒願排棄霞霧好
登攀龍飛送天路
鳳起出秦關身去長不返
簫聲時往還

贈故人馬子喬六首

躑躅城上羊攀隅
食玄草俱共日月輝
昏明獨何早夕風飄野
籜飛塵被長道親愛難
重見懷憂坐空老

空灰滅更燃夕華最更鮮
春冰雖暫解冬水復還堅
佳人捨我去賞愛長絕絃
歡至不留日感物輒傷年

松生隴坂上百尺下無枝
東南望河尾西北隱崑崖
野風振山籟朋鳥夜驚離
悲涼貫年節恣翠怛若斯
安得草木心不然寒暑移

種橘南池上種杏北池中
池北既少露池南又多風
早寒逼晚歲衰恨滿秋容
湘濱有靈鳥其字曰鳴鴻
一挹繒繳痛長別遠無雙
皎如川上鳥赫似掘中丹
宿心誰不欺明白古所難
憑楹觀皓露泗酒盪憂顏
永念平生意窮光不忍還
淹流徒攀桂延佇空結蘭
雙劍將離別先在匣中鳴
烟雨交將夕從此遂

分形雌沉吳江裏雄飛入楚城吳江深無底楚
關有崇扃一爲天地別豈直限幽明神物終不
隔千祀倘還并

採菱歌七首

驚舲馳桂浦息棹偃椒潭簫弄澄湘北菱歌清
漢南

弭榜牽蕙蕙停唱紉薰若含傷拾泉花縈念採
雲萼

睽闊逢暄新悽怨值妍華秋心不可盪春思亂
如麻

要艷雙嶼裏望美兩洲間裏裏風出浦容容日
向山

煙曠越障深箭迅楚江急空抱琴中悲徒望近
關泣

緘嘆凌珠淵收慨上金堤春芳行歇落是人方
未齊

思今懷近憶望古懷遠識懷古復懷今長懷終
無極

山行見孤桐

桐生藪石裡根孤地寒陰上倚崩岸勢下帶洞

阿深奔泉冬激射霧雨夏霖淫未霜葉已肅不
風條自吟昏明積苦思晝夜叫哀禽棄妾望掩
淚逐臣對撫心雖以慰單危悲涼不可任幸願
見雕斲爲君堂上琴

鮑氏集卷第六

鮑氏集卷第七

見賣玉器者 并序

見賣玉器者或人欲買疑其是珉不肯成市聊
作此詩以戲買者

涇渭不可雜珉玉當早分子實舊楚客蒙俗謬
前聞安知理孚采豈識質明温我方歷上國從
洛入函轅揚光十貴室馳譽四豪門竒轂振朝
邑高價服鄉村寧能與爾曹瑜瑕稍辯論

從登香爐峰

辭宗盛荆夢登高美鳧繹徒收杞梓饒魯非羽

人宅羅景藹雲扃沾光扈龍策御風親列涂乘
山窮禹迹含嘯對霧岑延蘿倚峰壁青冥搖烟
樹穹跨負天石霜崖滅土膏金澗測泉脉旋淵
袍星漢乳竇通海碧谷館駕鴻人巖樓咀丹客
殊物藏珍怪竒心隱仙籍高世伏音華綿古遁
精魄蕭瑟生哀聽參羌遠驚覲慚無獻賦才洗
汗奉毫帛

夢歸鄉

啣淚出郭門撫劔無人達沙風暗空起離心眷
鄉畿夜分就孤枕夢想慚言歸孀婦當戶歎搔

絲復鳴機慙欵論久別相將還綺闌歷歷簷下
涼朧朧帳裡輝刈蘭爭芬芳採菊競歲蕤開奩
奪香蘇探袖解纓徽寐中長路近覺後大江遠
驚起空歎息恍惚神魂飛白水漫漫浩浩高山壯
巍巍波瀾異徃復風雲改榮衰此土非吾土慷
慨當告誰

從臨海王上荆初發新渚

客行有苦樂但問客何行扳龍不待翼附驥絕
塵冥梁珪分楚牧羽鷁指金荆雲艫掩江汜千
里被連旌戾戾旦風道嘈嘈晨鼓鳴收纜辭帝

郊揚棹發皇京狐兔懷窟志犬馬戀主情撫襟
同太息相顧俱涕零奉役塗未啓思歸思已盈

望孤石

江南多暖谷雜樹茂寒峰朱華抱白雪陽條熙
朔風蚌節流綺藻輝石亂烟虹泄雲去無極馳
波往不窮肅歌清漏畢徘徊朝景終後一作生
會當幾歡酌每盈衷

登黃鶴磯

木落江渡寒鴈還風送秋臨流斷商絃瞰川悲
棹謳適郢無東轅還夏有西浮三崖隱丹磴九
派引滄流淚竹感湘別弄珠懷漢遊豈伊藥餌
泰得奪旅人憂

岐陽守風

差池玉繩高掩映一作藹瑤井沒廣岸屯宿陰懸
崖棲婦月役人喜光馳軍令申早發洲迥風正
悲江寒霧未歇飛雲日東西別鶴方楚越塵衣
孰揮澣蓬思亂光髮

在江陵歎年傷老

五難未易夷三命戒淵抱方瞳起松髓頰髮疑
桂腦役生良自休大患安足保開簾窺景夕備

屬雲物好翩翩燕弄風嫋嫋柳垂道池瀆亂蘋
萍園援美花草節如驚灰異零落就衰老

翫月城西門廨中

始見西南樓纖纖如玉鈎未映東北墀娟娟似
蛾眉蠶眉蔽珠櫳玉鈎隔瑣窓三五二八時千
里與君同夜移衡漢落徘徊入戶中歸華先委
露別葉早辭風客遊厭苦辛仕子倦飄塵休澣
自公日宴慰及私辰蜀琴抽白雪郢曲發陽春
肴乾酒未闕金壺啓久淪回軒駐輕蓋留酌待
情人

代挽歌

獨處重冥下憶昔登高臺傲岸平生中不爲物
所裁埏門只復閉白蟻相將來生時芳蘭體小
蟲今爲灾玄鬢無復根骷髏依青苔憶昔好飲
酒青盤進青梅彭韓及廉藺疇昔已成灰壯士
皆死盡餘人安在哉

夜聽妓二首

夜來坐幾時銀漢傾露落澄滄入閨景歲蕤被
園藿絲管感暮情哀音遶梁作芳盛不可怛及
歲共爲樂天明坐當散琴酒駛弦酌

蘭膏消耗夜轉多
亂筵雜坐更絃歌
傾情逐節寧不苦
特爲盛年惜容華

梅花落

中庭雜樹多偏爲梅
咨嗟問君何獨然
念其霜中能作蒼露
中能作實搖蕩春風
媚春日念爾零落逐
寒風徒有霜華無霜
質

古辭

容華不待年何爲客
遊梁九月寒陰合悲
風斷君腸嘆息空房
婦幽思坐自傷勞心
結遠路惆悵獨未央

可愛

風帷閃珠帶月幌垂
霧羅魏絜縫秋裳趙
豔習春歌

夜聽聲

辭鄉不覺遠歡寡憂
自繁何用慰愁望清
燭視夜翻

酒後

晨節無兩淹年意不
俱處自非羽酌歡何
用慰愁旅

講易

雲澤翔羽姬橫蓋招益人賁園無金尚履道易
書紳

王昭君

既事轉蓬遠心隨鴈路絕霜輝旦夕驚邊笳中
夜咽

中興歌十首

千冬遲一春萬夜見朝日生平值中興歡起百
憂畢

中興太運平化清四海樂祥景照玉臺紫煙遊
鳳閣

碧樓含夜月紫殿爭朝光綵墀散蘭麝風起自
生芳

白日照前牕玲瓏綺羅中美人掩輕扇含思訝
春風

三五容色滿四五妙華歇已輪春日歡分隨秋
光沒

比出湖邊戲前還苑中遊飛縠繞長松馳管逐
波流

九月秋水清三月春花滋千金逐良日皆競中
興時

窮泰已有分壽夭復屬天既見中興樂莫持憂
自煎

襄陽非卜地壽陽非帝城今日中興樂遙治在
上京

梅花一時艷竹葉千年色願君松柏心採照無
窮極

吳歌二首

夏口樊城岸魯邦却丹樓觀見流上還識是儂
泪流

人言荆江狹荆江定自濶五兩了無聞風聲那

得達

與謝書莊莊三連句

霞輝兮澗朗日靜兮川澄風輕苑欲開露重蘭
未勝水光溢兮松霧動山煙疊兮石露凝掩映
晨物彩連綿夕羽興

在荊州與張使君李居士連句

橋磴支吾轍篁路拂輕鞍三尹無喜色一造或
垂竿

月下登樓連句

彷彿蘿月光繽紛篁霧陰樂來亂憂念酒至歇

憂心鮑博露入覺牖高勞深測苑深清氣澄永

夜流吹不可臨王延秀密峰集浮碧踈瀾道瀛潯

漱玉廷幽性攀桂籍知音荀原辰意事淪晦良

懽戒勿侵昭景有遣駟孤賈無留金荀中書萬秋

字謎三首

二形二體四支八願四八二八飛泉仰流

頭如刀尾如鈎中央橫廣四角六抽右面負兩

刀左邊雙屬牛

乾之一九隻立無偶坤之二六宛然雙宿

鮑氏集卷第七

鮑氏集卷第八

擬行路難

奉君金卮之美酒璫瑁玉匣之雕琴七綵芙蓉

之羽帳九華葡萄之錦衾紅顏零落歲將暮寒

光宛轉時欲沉願君裁悲且減思聽我抵節行

路吟不見栢梁銅雀上窻聞古時清吹音

又

洛陽名工鑄為金博山千斲復萬鏤上刺秦女

攜手仙承君清夜之歡娛列置幃裡明燭前外

發龍鱗之丹綵內含麝芬之紫烟如今君心一

朝異對此長歎終百年

又

璇閨玉墀上椒閣文窓綉戶垂羅幙中有一人
字金蘭被服織羅采芳藿春燕差池風散梅開
幃對景弄春爵含歌攬涕怕抱愁人生幾時得
爲樂寧作野中之雙鳧不願雲間之別鶴

又

瀉水置平地各自東西南北流人生亦有命安
能行嘆復坐愁酌酒以自寬舉杯斷絕歌路難
心非木石豈無感吞聲躑躅不敢言

又

君不見河邊草冬時枯死春滿道君不見城上
日今暝沒盡去明朝復更出今我何時當得然
一去永滅入黃泉人生苦多歡樂少意氣敷腴
在盛年且願得志數相就床頭怕有沽酒錢功
名竹帛非我事存亡貴賤付皇天對案不能食
拔劍擊柱長嘆息丈夫生世會幾時安能蹠躐
垂羽翼弃置罷官去還家自休息朝出與親辭
暝還往親側弄兒牀前戲看嬾機中織自古聖
賢盡貧賤何況我輩孤且直

又

愁思忽而至跨馬出北門舉頭四顧望但見松
栢園荆棘鬱搏搏中有一息名杜鵑言是古時
蜀帝魄聲音哀苦鳴不息羽毛顛顛似人髡飛
走樹間逐蟲蟻豈憶往日天子尊念此死生變
化非常理中心惻愴不能言

又

中庭五株桃一株先作花陽春妖冶二三月從
風簸蕩落西家西家思婦見悲惋零淚霑衣撫
心歎初送我君出戶時何言淹留節回換床席

坐塵明鏡垢纖腰瘦削髮蓬亂人生不得怕稱
意惆悵徒倚至夜半劉蘂染黃絲黃絲歷亂不
可治我昔與君始相值爾時自謂可君意結帶
與我言死生好惡不相置今日見我顏色衰意
中索寞與先異還君金釵玳瑁簪不忍見此亦
愁思

君不見舜華不終朝須臾淹冉零落銷盛年妖
艷浮華輩不久亦當詣塚頭一去無還期千秋
萬歲無音詞孤鳧煢煢空壠間獨魄徘徊遶墳
基但聞風聲野鳥吟豈憶平生盛年時為此令

人多悲悒君當縱意自熙怡

又

君不見枯籜走階庭何時復青著故莖君不見
亡靈蒙享祀何時傾杯竭壺甕君當見此起憂
思寧及得與時人爭人生倏忽如絕電華年盛
德幾時見但令縱意存高尚旨酒佳肴相胥燕
持此從朝竟夕暮差得忘憂消愁怖胡爲惆悵
不能已難盡此曲令君忤

又

今年陽初花滿林明年冬末雪盈岑推移代謝

紛交轉我君邊戍獨稽沉執袂分別已三載迹
來淹寂無分音朝悲慘慘遂成滴暮思遶遶最
傷心膏沐芳餘久不御蓬首亂髮不設簪徒飛
輕埃舞空惟粉筐黛器靡復遺自生留世苦不
宰心中惕惕恒懷悲

又

春禽啾啾旦暮鳴最傷君子憂思情我初辭家
從軍僑榮志溢氣千雲霄流浪漸冉經三齡忽
有白髮素髭生今暮臨水拔已盡明日對鏡復
已盈但恐羈死為客思寄滅生空精每懷舊鄉

野念我舊人多悲轂忽見過客問何我寧知我家在南城答云我曾居君鄉知君遊宦在此城我行離邑已萬里今方羈役去遠征來時聞君婦閨中孀居獨宿有貞名亦云朝悲泣閑房又聞暮思泪沾裳形容憔悴非昔悅蓬髮衰顏不復粧見此令人有餘悲當願君懷不暫忘

又

君不見少壯從軍去白首流離不得還故鄉宵宵日夜隔音塵斷絕阻河關朔風蕭條白雲飛胡笳哀急邊氣寒聽此愁人兮柰何登山遠望得留顏將死胡馬跡寧見妻子難男兒生世軼軻欲何道綿憂推抑起長歎

君不見栢梁臺今日丘墟生草萊君不見阿房宮寒雲澤雉栖其中歌妓舞女今誰在高墳疊疊滿山隅長袖紛紛徒競世非我昔時千金軀隨酒逐樂任意去莫今含嘆下黃壚君不見冰上霜表裏陰且寒雖蒙朝日照信得幾時安民生故如此誰令摧折強相看年去年來自如削白髮零落不勝冠

又

君不見春鳥初至時百草含青俱作花寒風蕭索一旦至竟得幾時保光華日月流邁不相饒令我愁思怨恨多

又

諸君莫嘆貧富不貴由人丈夫四十強而仕余當二十弱冠辰莫言草木委冬雪會應蘇息遇陽春對酒叙長篇窮途運命委皇天但願罇中九醞滿莫惜林頭百箇錢直得優游卒一歲何勞辛苦事百年

松柏篇

并序

余患脚氣四十餘日知舊先借傳玄集以今病劇遂見還開表適見樂府詩龜鶴篇於危病中見長逝詞惻然酸懷抱如此重病彌時不差呼吸之喘舉目悲矣火藥間缺而擬之

松柏受命獨歷代長不衰人生浮且脆鳩若晨風悲東海迸逝川西山導落暉南郊悅籍短蒿里收永歸諒無疇昔時百病起盡期志士惜牛力忍勉自療治傾家行藥事顛沛去迎鑿徒備火石苦奄至不得辭龜齡安可護岱宗限已迫

睿聖不得留為喜何所益捨此赤縣居就彼黃
壚宅永離九原親長與三辰隔屬續生望盡闔
棺世業埋事痛存人心恨結亡者懷祖葬既云
及壙墜亦已開室族內外哭親踈同共哀外姻
遠近至名列通夜臺扶輿出殯宮低回戀庭室
天地有盡期我去無還日居者今已盡人事從
此畢火歇煙既沒形鎖聲亦滅鬼神來依我坐
人未辭訣大暮杳悠悠長時無時節鬱湮重冥
下煩寃難具說安寢委沉寔戀戀念平生事業
有餘結刊述未及成資儲無儋石兒女皆孩嬰

一朝放捨去萬恨纏我情追憶世上事束教
自拘明發靡怡念夕歸多憂虞撤間晨逕流輟
宴式酒濡自今暝日苦恨失爾時娛遙遙遠民
居獨埋深壤中墓前人跡滅塚上草日豐空林
嚮鳴蜩高松結悲風長寐無覺期誰知遊者躬
生坐處交廣連榻舒華裯已沒一何苦楛哉不
容身昔日平居時晨夕對六親今日掩柩何一
見無諧因禮席有降殺三齡速迴隙几筵就收
撤室宇改疇昔行女遊歸途仕子復王役家世
本平常獨有亡者劇時祀望歸來四節靜瑩丘

孝子撫墳號父子知來不欲還心依戀欲見絕
無由煩冤荒隴側肝心盡崩抽

侍宴覆舟山二首

勅為柳元景作

恩雨清上郊開雲照中縣遊軒越丹居輝燭集
涼殿凌高躋飛楹追焱起流宴搨苑含靈群崑
庭藏物變明暉燦神都麗氣冠華甸目遠幽情
周醴洽深恩遍

繁霜飛玉闥愛景麗皇州清蹕戒馳路羽蓋佇
宣游神居既崇盛崑險信環周禮俗陶德聲昌
會溢民謳慙無勝化質謬從雲雨浮一作遊

登廬山二首

懸裝亂水區薄旅次山楹千岩盛阻積萬壑勢
迴縈龍嵒高昔貌紛純襲前名洞間窺地脉聳
樹隱天經松磴上迷密雲竇下縱橫陰水實夏
結炎封信冬榮嘈噴晨鷗思叫嘯夜後清深崖
伏化迹穹岫闕長靈乘此樂山性重以遠遊情
方躋羽人途永與烟霧并

訪世失隱淪從山異靈士明發振雲冠升嶠遠
棲趾高岑隔半天長崖斷千里飛霧承星辰潭
壑洞江汜蘄絕類虎牙嶺岼象熊耳堙冰或百

年韜樹必千祀鷄鳴清澗中猿嘯白雲裡瑤波
逐穴開霞石觸峰起迴牙非一形參差反相似
傾聽鳳管賓緬望釣龍子松桂盈膝前如何穢
城市

發長松遇雪

出牛旣送寒莫陵一作陸方決馳振風搖地局封
雪滿空枝江渠合爲陸天野浩無涯飲兼凍馬
骨斲冰傷後疲昆明豈不慘黍谷寧可吹

蒜山被始興王命作

暮冬霜朔嚴地閉泉不流玄武藏木陰丹鳥一作

鳥還養羞勞農澤既周役車時亦休高薄符一作

浮好舊

一作清

藻駕及時遊鹿苑豈淹睇兔園不

足留升嶠眺日軌臨迥望滄洲雲生玉堂裏風
靡銀臺陬陂石類星懸嶼木似煙浮形勝信天
府珍寶麗皇州白日回清景芳艷洽懽柔參差
出寒吹颺戾江上謳王德愛文雅飛翰灑鳴球
美哉物會昌衣道服光猷

冬至

舟遷莊甚笑水流孔急難景移風度改日至晷
迴換眇眇負雪鶴皎皎帶霜鴈長河結蘭紆層

冰如玉岸哀哀古老容
滲顏愁歲晏催促時節
過逼迫聚離散美人還
未央鳴箏誰與彈

蜀四賢詠

渤渚水浴鳧春山玉抵鵲
皇漢方盛明群龍滿階閣
君平因世間得還守寂寞
閉簾注道德開卦述天爵
相如達生旨能屯復能躍
陵令無人事毫墨時灑落
褒氣有逸倫雅績信炳博
如今聖納賢金璫易羈絡
良遮神明游豈伊覃思作
玄經不期賞蟲篆憂散樂
首路或參差投駕均遠託
身表既非我生內任一作甚豐薄

秋日示休上人

枯桑葉未零疲客心易驚
今茲亦何早已聞絡緯鳴
迴風滅且起卷蓬息復征
愴愴簟上寒悽悽帳裡清
物色延暮思霜露逼朝榮
臨堂觀秋草東西望楚城
百物方蕭瑟坐嘆從此生

和王義興七夕

宵月向掩扉夜霧方當白
寒機思孀婦秋堂泣征客
匹命無單年偶影有雙夕
暫交金石心須吏雲雨隔

贈鮑侍郎

釋惠休

玳枝兮金英綠葉兮紫莖不入君玉盃低彩還
自榮想君不相艷酒上視塵生當令芳意重無
使盛年傾

答休上人

酒出野田稻菊生高岡草味顏復何竒能令君
傾倒玉盃徒自羞爲君愧此秋金蓋覆牙拌何
爲心獨愁

和工護軍秋夕

散漫秋雲遠蕭蕭霜月寒鷲颺西北起孤鴈夜
往還開軒當戶牖取琴試一彈停歌不能和終

曲久辛酸金氣方勁殺隆陽微且單泉涸甘井
竭節徙芳歲殘生事名多少誰共知易難投章
心蘊千里途輕紈願託孤老暇觴思暫開餐

懷遠人

哀樂生有端離會起無因去事難重念恍惚似
如神屬期眇起遠後遇邈無辰馳風掃遙路輕
蘿含夕塵思君成首疾欲息眉不伸

春羈

征人歎道避去鄉悵路邇佳期每無從淮陽非
咫尺春日起游心勞情出徙倚岫遠雲煙綿谷

屈靡迤風已花四散露濃條
暄妍正在
茲摧抑多嗟思嘶聲名邊豈我箱中紙染翰
餉君琴新轂憶解子

三日

氣暄動思心柳青起春懷時艷憐花藥服淨俛
登臺提觴野中飲愛心煙未開露色染春草泉
源潔冰苔泥泥濡露條娟娟承風裁鳧雛掇苦
薺黃鳥啣櫻梅解衿欣景預臨流競覆杯美人
竟何在浮心空自摧

苦雨

連陰積澆灌滂沱下霖亂沉雲日夕昏驟雨望
朝旦蹊澗走獸稀林寒鳥飛晏密霧冥下溪聚
雲屯高岸野雀無所依群雞聚空館川梁日已
廣懷人邈渺漫徒酌相思酒空急促明彈

三日游南苑

採性及華月追節逐芳雲勝舊溢林疏麗日擘
山文清潭圓翠會化薄綠綺紋合樽遽景斜折
榮委組芬

歲暮悲

霜露迭濡潤草木互榮落日夜改運周今悲復

如昨晝色苦沉陰白雪夜迴
皦潔胃霜雁飄揚出風鶴天寒多顏苦妍容逐丹壑絲胃千里心獨宿乏然諾歲暝美人還寒壺與誰酌

園中秋散

一作園中載散

負疾固無豫晨衿悵已單氣交蓬門踈風數園草殘荒墟半晚色幽庭憐夕寒既悲月戶清復切夜蟲酸流枕商聲苦騷殺年志闌臨歌不知調發興誰昇歡儻結延上清豈孤林下彈

詠秋

秋蘭徒晚綠流風漸不親颺我垂思幕驚此梁

上塵沉陰安可久豐景將遂淪何由忽靈化暫見別離人

秋夕

慮涕擁心用夜默發思機幽閨溢涼吹閒庭滿清暉紫蘭卷已歇青梧葉方稀江上淒海戾漢曲驚朔霏髮斑悟壯晚物謝知歲微臨宵嗟獨對撫賞怨情違躊躇空明月惆悵徒深帷

望水

刷鬢垂秋日登高觀水長千澗無別萬壑共一廣流駛巨石轉湍迴急沫岍高照

照寒洲爽東歸難忖惻日世

川憶古

事目孱千載想河伯自矜大
若沉涓莽

詠白雪

白珪誠自白不如雪光妍工隨物動氣能逐勢
方圓無妨玉顏媚不奪素繒鮮投心障苦節隱
迹避榮年蘭焚石旣斷何用恃芳堅

鮑氏集卷第八

書